

四庫全書

集部

欽定四庫全書

文忠集卷一百二十九

歷官表奏八

宋 周必大 撰

淳熙十五年

辭免謚冊寶行禮支賜銀絹劄子

三月 日
同諸廳

臣等準奉上謚冊寶行禮都大主管所傳奉聖旨以臣等告廟奉上兩節次各賜銀絹臣等恭惟先皇厭世支費不貲陛下聖孝通神務隆追遠臣等忝備近列誼當

體國縱未能少捐俸入仰助職金豈容冒膺厚賜况茲
恤典異乎慶禮臣等決不敢祇受伏望聖慈亟行寢免
臣等無任祈天俟命激切屏營之至伏取進止

攝太傅持節前導太上梓宮量帶激賞庫官會

搗設劄子

臣被旨前導太上梓宮過江止關借奉使印一面并帶
禮房五人使令五十餘人既不曾有所申請即無借請
批支恩賞之類恐到攢宮搗設人匠等於事體或不合

免已令激賞庫使臣量帶官會前去謹具奏知伏乞睿
照

光堯梓宮發引慰皇帝表

已下攝太傅從
梓宮同諸使

臣某等言今月十八日恭導聖神武文憲孝皇帝靈駕
發引者賓天浸久遠日俄臨儼縞仗以前陳指濤江而
利涉臣等誠哀誠痛頓首頓首伏惟皇帝陛下邁周達
孝如舜慕親已遘執翣之驅未弭割繩之痛尚祈寬釋
以幸邇遐臣等無任瞻天望聖激切屏營之至謹奉表

陳慰以聞

慰皇太后牋

臣某等言今月十八日恭導聖神武文憲孝皇帝靈駕
發引者厥儀夙設法仗載嚴背宮苑以徂征隔烟波而
少駐臣等云云伏惟皇太后殿下至哉坤載痛此天傾
念五紀之順承忍一朝之變故願寬聖性永著母儀臣
等無任激切屏營之至謹奉牋陳慰以聞

慰皇后牋

臣某等言今月十八日恭導聖神武文憲孝皇帝靈駕
發引者龍胡滋遠悲莫返於慈宮鳳綵啟行帳暫留於
近岸臣某等云云伏惟皇后殿下道隆周如德協虞賓
久宣盥饋之勞方助聖明之孝願循至理少抑哀悰臣
等無任

光堯梓宮到思陵攢宮安寧奏狀

臣某等恭導聖神武文憲孝皇帝靈駕今月二十二日
已達永思陵攢宮安寧者八翌徐行百神祇護奉輜車

而戾止瞻陵阜之巋然欽惟慈皇獨享至養富貴尊榮
之樂歲月彌長康寧壽考之祥古今鮮儷茲陟乘雲之
御將臨甫窈之期出城闈則景霽而月升渡浙水則風
和而潮應豈非人力實契天心此蓋皇帝陛下躬舜禹
之資邁參騫之行宅恤雖居於宮闕懷思每置於川途
繫次舍之無虞皆孝誠之有感臣等猥叨官使何補思
存想聖慮之少寬與羣情而胥幸瞻望宸扆臣等無任
激切屏營之至謹具狀奏聞謹奏

慰皇太后牋

臣某等言恭導聖神武文憲孝皇帝靈駕今月二十二日已達永思陵攢宮安寧者羽衛煌煌共隨仙仗佳城鬱鬱甫達初陵臣某等云云伏惟皇太后殿下輔佐功高慈仁道備位方隆於儂極痛乃隔於中天願抑哀思獨膺至養臣等無任激切屏營之至謹奉牋陳慰以聞

慰皇后牋

臣某等言恭導聖神武文憲孝皇帝靈駕今月二十二

日已達永思陵攢宮安寧者殿虛德壽莫返於容車陵
揭永思初停於畫婁臣某等云云伏惟皇后殿下柔明
蘊質愛敬存心久佐餽以歡然茲過宮而戚若尚祈寬
釋庸輔皇明臣等云云

三月二十四日奏

臣等到永思陵已三日陰雨連綿乃春夏之常前者在
途特然晴霽聖孝昭格蓋可見矣即日恭惟聖躬萬福
臣等謹此伸候起居伏乞睿照

三月二十七日奏

臣等不侍天顏已經旬浹恭惟聖躬萬福謹上問起居
謹奏

永思陵掩攢慰皇帝表

臣某等言今月三十日聖神武文憲孝皇帝攢宮掩皇
堂禮畢者稽陰地勝陵邑天成丘繞四蛇居切帝鴻之
畏勢如萬馬允符郭璞之占大事克襄淵衷永慕臣某
等誠哀誠痛頓首頓首伏惟皇帝陛下誠深繼志禮厚

崇終三載衰麻正百王之隆典五詩挽餞感萬姓之悲
心茲甫畢於因山諒興哀於陟岵願副含生之望少寬
罔極之懷臣等無任瞻天望聖激切屏營之至謹奉表
陳慰以聞

慰皇太后牋

臣某等言今月三十日聖神武文憲孝皇帝攢宮掩皇
堂禮畢者六紼引輶甫諧襄事九虞發軔初導靈威念
永闕於梓宮諒增悲於椒殿臣等云云伏惟皇太后殿

下夙推厚德久播徽音西宴瑤池莫返穆王之駕東朝
長樂方隆漢后之儀願紆慈壺之過哀永受聖君之至
養臣等無任激切懇祈之至謹奉牋云云

慰皇后牋

臣某等言今月三十日聖神武文憲孝皇帝攢宮掩皇
堂禮畢者地隣禹穴土復堯陵繫聖孝之加隆諒柔衷
之胥惻臣等云云伏惟皇后殿下協宣陰教夙著婦儀
當九錫之告成偕兩宮而永慨方勤內助願抑至情臣

等無任

乞導從虞主還行在奏

同摠護禮儀儀使鹵簿橋道頓遞使奏

臣等準尚書省劄子脩坐禮部太常寺狀三月三十日
聖神武文憲孝皇帝梓宮掩攢宮畢所有攝太傅總護
使以下行事官即便回程三月十六日奉聖旨依臣等
檢照本朝故事山陵等五使係隨虞主還京紹興十二
年徽宗掩攢之時緣紹興七年先已立虞祔廟摠護使
以下所以徑赴行在至紹興二十九年顯仁皇后掩攢

誤用紹興十二年變禮今來聖神武文憲孝皇帝虞主
在途事體不輕臣等欲參酌典故導從渡江比之徑回
止爭三日餘行事官自遵已降指揮先回於義為允伏

取進止

奉聖
旨依

謝傳宣撫問并賜銀合茶藥狀

四月

右臣伏蒙聖慈特降中使傳宣撫問并賜臣銀合茶藥
者堯陵送往魏闕勞還寵之慰藉之言貳以珍良之賜
拜恩深厚揣分兢慚伏念臣祗率故常暫從行役繫懋

隆於聖孝致昭格於天心况親賢宣摠護之勞且郡邑
勵恪承之志禮無違者臣何力焉伏遇皇帝陛下至德
奉先深仁待下既克襄於鉅典庸加惠於庶工不遺尸
素之臣亦溥龍光之施莫知報塞惟誓糜捐臣無任感
天荷聖激切屏營之至謹錄奏謝以聞謹奏

未敢乞對劄子

臣等訖事歸闕今早已放朝見竊恐親行三虞聖心惻
楚未敢乞對恭俟奏事日分俯伏榻前控叙悽悽之情

仰乞睿照

辭免德壽宮銀絹劄子

臣昨於三月十七日準主管支費所送到德壽宮遣奠奉辭發引三節次銀絹六百疋兩日子一道緣臣未得俯伏控辭是以不敢支請今早登對亟露危懇蓋緣昨來奉上聖神武文憲孝皇帝憲節皇后冊寶已叨錫賚自不應重疊冒受厚賜曲蒙聖慈諒其誠請許以辭免所有日子謹用繳進乞降付支費所照會毀抹取進止

求去劄子 四月

臣輒披悃幅仰瀆聖聰臣以匪材久塵二府適虛次輔
遂預政機望實素輕衆所不與蒞職伊始即因荐士被
沮臣忝備近弼惟當助成臺諫敢言之氣不敢有所分
辨蓋嘗奏知少俟數月即謀引去偶因去年閔雨繼以
高宗變故逡巡苟且忽尔踰年方欲力伸前請又值首
相丐外臣驟以踈率猥尸大任晚夕憂懼自知必致人
言昨日果有臺官文字覺察大理司農除授非宜夫相

業惟在進退百官而臣進擬之初便致論列若復頑然
不顧廉耻包羞竊位繼此別有彈擊必將倍費保全又
况旬日以來雨意慳甚由臣涼薄再召旱祥衆情嗷嗷
誰執其咎夫人主之職專在論相欲知相之賢否惟視
人心天意如何今臣自蒙擢任每為公論所非連歲之
間雨暘罕曾協序天人之際亦可推矣伏望陛下收還
印綬許奉外祠仰成真才庸贊聖治自然衆志孚而時
雨降非獨微臣獲免大戾抑天下幸甚干犯威尊臣無

任戰栗俟命之至取進止

辭免提舉編修玉牒劄子

臣準尚書省劄子五月二十二日奉聖旨差臣提舉編修玉牒臣欽承恩渥增震孤衷伏以紀謨烈以示後人繫本支而綿百世鏤牒本由於唐代成書獨備於聖朝粵自中興尤嚴故實雖承乏或容於次輔而提綱當俟於元台豈伊具臣堪此衆職矧百僚之不廢任虛次以何嫌仰冀皇明俯昭愚悃免與聞於大典姑曲徇於小

庶冒瀆天威臣無任戰栗俟命之至伏取進止

不允詔

勅某云云具悉朕承祖宗之休尊典則之懿瞻寶牒之所勒與史冊而並驅業盛功崇必謹儒紳之載筆事宏體重要勤揆席之提綱乃咨弼亮之英俾摠纂修之緒惟闕文而作一藝勉率乃僚則錫羨而符三皇永垂厥後方茲倚矚奚用懇辭所辭宜不允

再辭免劄子

臣近蒙聖恩差兼提舉編修玉牒嘗具辭免伏奉詔書
不允臣以曾懷葉衡史浩趙雄王淮任右相日皆兼此
職又參知政事留正見同提舉詳定勅令蕭燧權監脩
日歷事體適均臣所以不敢固辭然亦未敢祇受勅命
今覩已降指揮用紹興三十一年故事省罷勅令所則
是留正別無兼局而臣已自提舉國史院會要所若猶
兼領理有未安欲望聖慈改差留正權提舉編修玉牒
庶得允當伏取進上

奉御筆
批依

淳熙十五年

明堂禮成同宮僚賀東宮劄子

某等茲者伏覩大禮告成聖君受祉恭惟皇太子殿下
竭誠清廟致敬貳觴協修上儀均惠四海某等未獲躬
詣宮庭下情無任瞻仰頌詠之至

謝封濟國公表

臣某言伏奉制命封臣濟國公加食邑一千戶食實封
四百戶者配天其澤溥均汶上之釐裂地而封首賜濟

陽之履逢辰有幸揣分無堪臣某中謝臣竊以徧秩羣神莫嚴宗祀肇分五等實重公主當聖君不憚於親祈宜百辟咸思於職助而臣學懵九筵之制位叨兩社之間猥備相儀甚慚該輔拜恩綸而邀福啟封國以知榮茲蓋伏遇皇帝陛下誠格顯幽仁周品物謂天地祖宗之並况已敷錫於臣民則股肱心腹之同休宜申加於爵邑是推洪施罔間素餐臣敢不仰服龍光俯殫駑鈍感鬼神而問通今雖愧於博聞披輿地之圖復古尚期

於親見臣無任

謝東宮牋

某言伏奉制命封某濟國公加食邑一千戶食實封四百戶者相禮親祠幸免周南之嘆敷綸禁苑榮加濟北之封恩厚不貲感深無藝某中謝竊以歲儀三歲今古之彌文均福萬方國家之盛德凡預駿奔之列率先賚予之豐如某者獲際昌辰叨塵近弼初乏一毫之補俶開百里之邦雖潤澤之溥施在孱庸而獨愧茲蓋伏遇

皇太子殿下聰明仁孝恭敬溫文重屋貳觴儼進陪於
陟恪繁機參決居密助於厲精眷乃舊僚被之新渥某
敢不深思遇合勉竭贊襄受宣室之釐此日固慚於前
席賜齊侯之昨他時猶冀於歸疆其無任

辭免加恩正謝日擢賜劄子

同執政

臣等恭遇大禮告成蒙恩各加封邑無功受寵慚懼因
措虔遵近詔不敢陳免今欲來日祇受告命二十八日
入謝所有例賜衣帶鞍馬非惟已沾賚子不應重為廐

庫之費兼臣等帶佩鞍韉既未仍舊亦難拜賜於庭伏望聖慈權許請免一次庶安愚分稍協於禮伏取進止

奉御筆
批依

乞去劄子

十一月初四日上宣
論內禪事不許去

臣敬據愚悃仰瀆睿聰伏念臣本緣涉獵藝文僥覲祿位不自意蒙聖主非常之知致身華要年除歲遷遂玷宰司物望不孚心常自歎盖以性資淺陋非大受之器舉措輕率非任重之才比日以來憂懼成疾外猶勉強

中實衰疲雖荷陛下待遇優隆信任專一偶未置於訶
譴然趾顛餽覆人多為臣危之引退曲折夙嘗具奏幸
今國家閒暇可以陳情伏况臣自還從班於今十有四
載叨塵二府又涉九年歷考在廷鮮有如是之久者每
見士大夫更迭補外未嘗不省躬而愧也且漢文帝時
周勃甫為相會遣列侯就國辭不行即免勃以率之概
諸古誼臣今有請亦晚矣伏望聖慈洞察衷誠保全終
始許解機政畀之外祠微臣苟未隕越他日誓死報國

干犯天威臣無任震灼俟命之至取進止

淳熙十六年

辭免左丞相劄子

正月八日

臣伏蒙聖慈授臣左丞相仍降中使宣押赴都堂治事
臣驟聞成命凜無所措竊以左右置輔均為股肱顏面
正朝尤謹厥與是宜博謀於縉紳參考以夢卜惟賢是
用鈞築何嫌不當如庶府百司許以序遷而倖進也如
臣庸鄙加之懦弱初無才能術學可備官使特由幸會

誤被簡知周旋政塗殆且十載凡陛下試臣者不為不
久用臣者不為不盡而年齡晚晚鼠技易窮竊位素餐
愧見班列比嘗求退未奉俞旨仲春再請之言已闕睿
聽敢期息獎更冒超遷譬如疲馬伏在廐櫪縱復益之
芻秣嚴其鞭策非特難於致遠抑將顛踣是虞此臣所
以跼蹐戰兢辭避不容於備禮也伏望陛下推父母愛
憐之德廓日月照臨之明與其用之過而納之罪戾之
中孰若察其情而措之安全之地收還渙渥少息危悰

引分歸耕嗣輸誠懇冒犯天威臣無任虔祈俟命之至
取進止

不允詔

勅某云云具悉上相之任摠領百官惟德望足以尊
朝廷才量足以任天下乃膺倚屬以起治功卿命世
鴻儒高明特達自持國秉績用為多曩居次輔夙夜
究勤而庶政日新百度具舉既深契於朕心就陞端
揆蓋示褒崇牘章鼎來謙辭恭過非朕所聞也即宜

祇命益底殊功所請宜不允

第二劄子

臣一介無取蒙陛下待遇殊常致身輔相初無毫髮之善可報萬一坐是兢畏過甚流於委靡徒以貪戀聖恩未忍決然引去忽聞宣制驟進左席宜黜而遷方此惶惑暨讀訓詞有患失容身之戒臣心魂飛越無地措躬蓋以孔子所謂鄙夫乃無所不至之人車千秋之容身班固以彼哉誚之今乃使冒居元輔朝夕左右將何以

倡率百辟風示四方且中外臣庶明知兩相制書抑揚
不同在於人情寧免觀望往者洪适固有此語隨即被
劾蓋龜鑑也臣來日更不敢入局候十一日榻前控陳
懇款謹先具奏稟伏望聖慈念其奉事之久閔其自處
之難特賜矜體稍全進退臣不勝萬幸干犯宸嚴臣無
任戰慄俟罪之至

東宮劄子

同日納

某伏覩今月八日制書除某左丞相某庸愚無取已試

因功誤被恩遷實踰分量已具奏控免欲望令慈因視
膳問安之際賜以一言庶幾收還成命安此危衷某下
情無任虔懇之至

乞去第一劄子

正月十一日

臣輒傾肝胆仰瀆睿聰臣器資庸陋謨謀淺拙徒緣翰
墨遭際聖明歲月推移玷丞輔毫分莫効懼負在中
爰自去冬力求罷免聖恩天大未賜允俞即嘗面奏俟
正二月間再伸懇悃必冀矜從方欲陳述間忽被遷陞

之寵周章失措如蹈淵谷若不亟投君父期遂夙心則
祇受新命之後又須年歲乃敢繼請非獨智力殫竭決
無能為而有言不踐實鄰欺誕為臣如此罪豈容誅伏
望聖慈俯加憐察許臣解罷機政授一在外宮觀差遣
餘生倘或未泯誓圖報於異日干犯威尊臣無任戰慄
俟命之至取進止

奉御筆批朕登庸元輔委任尤深
遽上祠章實難從允可降詔不允

不允詔

勅某云云具悉君臣之道相須而成廟朝之賢益重

其選矧若鼎司之舊方加魁柄之崇期體此以欽承
曷翩然而引避朕登庸元輔委任尤深遽上祠章實
難從允宜即承於親詔乃克副於眷懷所請宜不允

第二劄子

十三日御前遣人
有所批問附奏

臣昨日陳乞罷政恭聆玉音謙諭過甚臣驚懼感激未
能畢其說而對班將引遂忽忽而退尋聞貼麻批詔兩
日之間三勤勅使宣押凡可以假借微臣者無所不用
其至在聖君優禮近列務存體貌可謂重矣臣之進退

所宜自審蓋以資性凡下本無輔相之才非獨聖鑒難
逃詢之輿論莫不謂其當去是以自冬涉春每因留身
必面奏此意忽叨除授義難安處乃敢決然有請豈謂
眷寵殊常未賜聽允已上表陳乞而通進司得旨不許
收接恭俟十五日俯伏軒墀別伸情悃謹此附奏臣無
任戰懼之至伏乞睿照

第三劄子

十四日御前復遣人
有所批問再此附奏

臣近累具劄子陳乞解罷機政授一在外宮觀差遣特

蒙聖恩三遣中使宣押仍傳旨令趣朝參奏事在於恩禮可謂詳盡臣尚有曲折須至奏稟蓋措紳間只知臣因八日制詞播告懷不自安然十一日初至榻前陛下即宣宰執並前聖語諄諄備彰謙抑臣兢惶失措感極涕零旋聞宣召詞臣改製謨訓且復親批四句載之答詔昔熙寧中王安石因詔書有士大夫沸騰黎元騷動之語辨數乞退神宗皇帝止諭為文督迫之過今者訓飭乃與蔣芾所草洪适制並同恐是一時遣詞循用前

例而陛下聖語息勤不止於為文督迫而已臣豈敢以此過疑固執愚見但臣自去冬至歲除及今年正月五日四留身具言臣非輔相之才願備祠官少逭尸素此則陛下所知而中外所未知也臣若未有遷除尚可少緩今乃就陞元宰安得無嫌故官既不可居新命又難祇受在臣進退之誼自宜力請即與前說不相干涉仰惟聖朝必賜矜察臣緣章表無由投進又有旨不許出門欲俟來早面奏深恐駕出難以詳述謹先此附奏伏

望聖慈即賜處分疊犯天威臣無任戰懼俟罪之至取
進止

第四劄子

臣昨日再具手劄乞罷機政授一在外宮觀差遣見今
踧踖俟命緣臣既難復居舊職又不敢祇受新命進退
無據心不遑寧欲望聖慈速降處分臣無任戰慄祇懇
之至取進止

後因臺官上殿及翰林學士李燾上云朕何嘗令如此措詞遂降旨與郡明日將上

乞除職名上不許

辭免左丞相表

臣某言伏蒙聖慈以臣辭免新授特進左丞相進封許國公加食邑食實封恩命特降詔書不允者登備鼎司久當策免晉持魁榜倏奉庭揚顙天陳不稱之詞伏地拜弗俞之詔鴻私溥博孤跡凌兢臣某中謝臣聞受才有洪纖賦質有良窳扶明堂者資梁棟安用條枚荐清廟者須鼎彝寧參瓦礫力不勝任人將汝瑕伏念臣振闡材微斗筭器小會際光華之旦追陪寅亮之聯罪功

宜詔賞誅漫無可否賢鄙當明黜陟殊情抑揚觀已事
之如斯豈後圖之足責敢謂羣賢之進遽叨左席之除
有次輔雖不備官職焉何曠無成勞亦令賜位臣也胡
顏為國計以牢辭非身謀之獨審伏望皇帝陛下謹於
國任監乃知難外求巖穴之英內選朝廷之雋俾居三
事庸長百僚遜於及斯伯與敢忘稽首有若號叔閔天
尚助迪威從欲之仁鞠躬以俟臣無任

批答 倪思撰

省表具之魁柄之重疇咨惟難未得其人擇之貴乎
審已當其選任之不復疑卿以大道格君心以至公
宰天下已試之效昭然甚明非常之才用而未盡爰
升元輔式究遠猷乃於登庸之初遽欲引避而去開
諭已至懇祈尚堅在朕心則注意方深在物論則金
言惟允爰折伯與固可遜未聞虞舜之必從號叔閔
天雖曰賢視周公而弗及以是為說毋乃太謙亟其
祇承副此隆委所辭宜不允

第二辭表

臣某言伏蒙聖慈以臣上表辭免特進左丞相進封許國公加食邑食實封恩命特降中使賜臣批荅不允者銀臺入奏力辭端揆之崇鑿禁批章特屈王人之重雖貪承命抑懼瘵官敬陳確至之言疊冒穹窿之聽臣某中謝臣聞位高者智愚難掩任久者賞罰易行九載之績不成當從鯀殛三考之明弗陟孰底舜功如臣無堪被遇最早越自嚴徐之列進陪夔契之遊碌碌政途殆

彌七歲容容宰路仍涉再朞論其時則已多責其效則
何有未能引去姑俟汰歸今乃位充元輔之久虛秩序
文階之一品既殊試可又異黜幽况故官不許復居而
新命又為非據進退交違於小誤勸懲將累於大公伏
望皇帝陛下旁燭忱恂敷求俊傑貸妨賢之徃咎審佐
聖之良圖謂如髮之引千鈞其誰云可因循墻而走三
命亟報曰俞情辭已竭於肺肝察允尚收於綸綍臣無

任云云

奉御筆批降批答
不允仍斷來章

批答

省表具之朕念天下萬幾之繁宵旰臨朝未嘗敢一日忘也惟卿處輔弼之任實孜孜奉國夙夜勤彊總領衆職以副朕意是用進之上宰益究所施而乃懇避再三逡巡未就累日於此豈不少淹庶務乎徃其勵翼毋復有陳所辭宜不允仍斷來章

謝表

臣某言伏奉制命授臣特進左丞相許國公加食邑食

實封累具辭免伏蒙聖慈特降中使賜臣批荅不允仍
斷來章者次輔躡居久知非稱冢卿序進彌愧固功賜
漢位以升階假許田而胙土恩高峙嶽懼甚履冰臣某
中謝臣聞天以不言行四時賴回旋於六子君以無為
成萬物資勵翼於四鄰繫上下之相須乃事功之克濟
諒非帝賚疇允民瞻如臣者學昧通方才踈應務僥倖
夙膺於簡擢選除徧歷於高華粵自登庸每虞曠職土
疆尚隔曾何闡國之謀人力未蘓安得富民之策清不

足以革貪奢之俗直不足以移委靡之風而况變調陰陽制作禮樂遠繼三謨之盛俯諧四岳之咨退省其愚固慚斯道方懇祈於罷免乃誤被於超遷嘗抗疏以屢辭迄覲顏而祇拜茲蓋伏遇皇帝陛下聖神廣運功德兼隆有臣三千已得同心之助舉相十六聿觀熙載之能何敢妄庸首陪弼亮臣敢不深思忝冒力勉墮媮惟尹暨湯雖乏格天之效安劉必勃尚存念祖之心臣無任云云

謝東宮牋

某言伏奉制命授某特進左丞相許國公加食邑食實
封者選備宮端久戴密庸之造擢持魁柄更叨序進之
恩俶拜賜於龍墀即叙言於鶴禁某中謝伏念某居慙
骯骯素昧經綸偶逢亨嘉浸竊顯美自親附於三善殆
推遷於六年知憐既殊獎勵尤至賴褒揚於黼辰俄參
幹於鈞樞猥以小人之儒遂為天子之宰衆譏弗稱心
識所從蓋魏相鍾繇賜斧本東宮之眷而唐登從愿覆

既資儲極之言昔也耳聞今而身見茲蓋伏遇皇太子
殿下功高監撫譽著參裁作新無間於羣才念舊不遺
於一介肆頒邦渙交秉國成某敢不叙飭九功摠提衆
職仰稽象緯顧顙面以非宜俯振朝綱尚同心而夾輔
某無任

辭免兼職劄子

臣伏覩今月二十八日已降指揮差臣兼提舉編脩玉
牒監脩國史日歷者任非所據愧不自勝臣聞百世本

支方慶源之有行萬年壽考正鴻業之無窮雖筆削屬
在羣工而總提付之上宰倘其人之未稱寧厥位之或虛
如臣闕然何以堪此伏望陛下念聖世當嚴二典察腐
儒素乏三長毋專故事之循徐俟真才而授丹衷斯罄
淵聽必孚所有前件兼職欲乞聖慈特賜寢免臣無任
戰懼俟命之至伏取進止

奉御寶批
降詔不允

不允詔

倪思撰

勅某云云具悉朕嚴鏤牒以揚烈聖之休謹汗簡以

紀當世之實纂修之職分命於諸儒綱領之權必歸於上宰卿以造微之學貫道之文既擢冠於羣工宜并提於二史益據賢蘊增煥皇猷條祖宗典則之休進而施於政舉朝廷事為之要退而筆諸書豈不休哉無足辭者所辭宜不允

文忠集卷一百二十九

欽定四庫全書

文忠集卷一百三十

歷官表奏九

宋 周必大 撰

淳熙十六年

辭免少保劄子

臣伏覩制書特授臣少保進封益國公加食邑食實封者殊私曲被駭汗交流臣聞賞當其功謂之慶授非其人謂之僭邇者壽皇聖帝親以大寶傳授聖明當行慶

施惠之初夷夏傾耳以聽號令臣於斯時悞尸宰事所
宜協贊陛下愛惜名器脩明紀綱豈容身自僥踰或愆
於義伏况孤保之任專待勛德前後輔臣得此者鮮而
乃首揚大庭之號加臣非分之寵本欲行慶反行僭賞
其為初政之累也大矣臣今未敢奉行制命蓋將必冀
寢免若謂溥博之恩徧及臣庶不使微臣獨未沾被則
臣固嘗面奏乞許回授私心公論庶皆合宜伏望聖慈
特賜矜允干犯天威臣無任兢惶懇切之至取進止

御奉

寶批降
詔不允

不允詔 倪思撰

勅某云云具悉昔舜以天下禪禹精一執中之旨既
心傳而面命之矣又擇益稷之賢置諸左右以輔相
其治授受之美於是為至惟我壽皇實用此道將以
神器畀於冲人故首擢卿居上相之位卿親逢盛時
密贊大計肆朕纘紹凡厥政事悉所仰成茂勛如此
晉位亞保䟽封大國其於寵褒未為過也往其祇命

母事固辭所辭宜不允

辭免表

臣某言伏蒙聖慈以臣辭免特授少保益國公加食邑
食實封特降詔書不允者該輔無功際九五御天之始
䟽榮有命居二三執政之先方備控於忱詞已隨頒於
溫詔明知踰分敢避瀆尊臣某中謝臣竊惟左棘之聯
時乃面槐之貳周官立訓資兩儀宙亮之功漢志垂謨
任萬乘燕私之責歷代久忘於古誼政和初定於宏規

必酬勲德之隆或待親賢之茂上非虛授下難冒居如
臣者稟資迂愚遭世休顯大言則望大利每愧事君小
材不離小官自甘累日詎期頻歲連陟崇階會逢離照
之明更下異申之命式是百辟久不稱於儀圖茲惟三
孤顧豈容於官備伏望皇帝陛下道無私覆明以公生
謹旌褒者當在政初抑僥倖者必由貴始特回悞寵姑
許貶恩既免累於清朝亦獲安於素守臣無任云云
寶批降批
答不允

批答

省表具之壽皇不以朕菲德使承大統既擢卿上台
屬以輔朕在廷翌戴之勛未有先於卿者矣進班孤
棘實按著令而卿執志堅確引義固辭使朕崇報之
意慙然不安於中在卿則為高在朕則為薄矧當初
政令出惟行既已告廷豈容反汗卿宜為國惜之其
即欽承毋廢休命所辭宜不允

再辭免表

臣某言伏蒙聖慈以臣上表辭免特授少保益國公加
食邑食實封恩命特降中使賜臣批答不允者悃悞之
言踵詔音而上瀆丁寧之訓勤勅使以來宣凜危慮之
未安控堅辭而弗已臣其中謝臣竊以龍飛之慶溥及
華夷蠢動之微咸沾雨露幸叨居於輔佐例覃被於光
榮倘大義之罔愆在小廉而可略惟今亞保乃昔司空
有德者不必真除况臣無弼諧之德有勞者未嘗序進
况臣無翊戴之勞直緣會遇於一時遂假寵靈於三少

自猶知其弗稱人豈謂之當然蓋取非其分則灾身而
與過其宜則累國是敢懇懇前疏之側且將忉忉累牘
之中期這滿盈少逃謹責何上紆於宸眷復申戒於汝
諧施重丘山懼深淵谷伏望皇帝陛下持爵馭其臣之
要稽賞延於世之文許以貴名貶之賤息如是則恩從
隗始已毋廢於舊章民具尹瞻亦免干於新政臣之幸
也天必從之臣無任云云

奉御寶批降批答
不允仍斷來章

批答 倪思撰

省表具之孤棘之任專待勛德而不可序進卿言是
矣夫以命世之賢贊親傳之策厥今勛德孰有如卿
者乎矧輔弼之臣遭逢內禪稽諸舊典例進兩秩今
自文階之冠升亞保之聯纔一等耳朕方以未足酬
卿為歎而卿懇辭不已顧欲貶恩毋乃執謙之過乎
宜體至意勿復有請所辭宜不允仍斷來章

再辭免劄子

臣猥以凡才久事陛下於東宮今值君臨萬邦又得備

位宰輔其為榮幸殆非衆比覃霈所加臣何敢固辭惟是三孤重任與尋常遷轉不同非親非賢非有大功未始輕畀臣實何人乃敢當此若謂恩由近始理難獨遺臣固已屢奏乞許回授倘蒙陛下曲從所請則是國之大慶非不沾被而况制命告廷人皆知陛下待臣禮意甚寵今者自緣揣分量才再三控避陛下不得已而聽之在臣居之則安於國又免僭賞其為大賜奚啻一官而已臣已再上表辭免謹具劄子申叙懇款必冀大慈

即賜俞允臣無任惶懼俟命之至伏取進止

不允詔 倪思撰

勅某云云具悉朕於即政之始凡厥命令未嘗不謹而後出矧登進孤保褒寵台輔茲事體大顧豈輕易而發哉命出惟行誠難反汗而卿執謙不已是未諭朕意也至若貶恩子姓必無官可進然後用此卿爵秩雖崇未云極品授以為說則又非宜其亟欽承毋稽成命所請宜不允

第三辭劄子

臣比蒙聖慈以覃恩特授少保雖名一官然與其他文階不同屢嘗面奏及於辭免表奏劄中具言只乞許臣回授兩奉詔書疊勤批荅且宣諭再三未賜允俞臣感激兢懼無地措躬以理揆之終非所據况留正元轉兩宮力辭其一臣若冒受公議謂何仰冀聖明允臣所乞至於進封加食邑更不敢固辭乞令學士院貼麻施行伏取進止

不允詔

勅某云云具悉朕於股肱大臣無所不致其厚矧國朝以來位特進而爵亞保者止是次遷初非躡等况卿羽翼朕於東宮弼諧朕之初政功德之茂誰復如卿參稽典章稍涉位序未盡褒崇之禮寧虞冒受之嫌遜辭沓來殊弗朕意亟宜祇受毋使人議朕於報功而薄也所辭宜不允

第四辭劄子

臣此月九日面奏乞以轉少保一官許令回授恭聆宣諭謂成命已行不必多辭臣繼具劄子陳述又蒙降詔不允仰惟聖恩隆厚度越常格非臣糜捐所能報稱自當祇承德意豈敢固執不移但臣正月間轉廳日已自增秩三等僅及月餘復此峻遷非獨在臣私義獨安實恐名器輕假仰累初政此臣所以寧用煩瀆獲謹不敢自恕而但已也伏望天慈特賜矜許止加封邑貼麻行下臣意迫辭窮無任戰慄俟命之至取進止

辭免冊命劄子

臣比值覃恩進陞孤保懇辭六七面命再三雖已欽承
實深祇懼惟是冊拜未嘗舉行仰祈聖明許賜寢免冒
瀆宸極臣無任惶懼俟命之至取進止

奉御寶批
降詔宜允

允詔 倪思撰

勅某云云具悉朕始嗣寶歷褒崇輔臣考圖按爵秩
卿亞保方詔有司卜良日序搢紳於位列金石於庭
備物典冊親臨軒而授之所以明貴貴也而卿處榮

弗矜爰比丐免顧忱誠之有素在謙德以采光茲用
勉從益深嘉尚所辭宜允

乞序位在嘉王之下

三月

臣等伏見漢制諸侯王在丞相之上本朝太平興國八
年十一月雖詔改定位序當時宰臣宋琪等固辭其後
治平元年六月韓琦等亦嘗表請立班頴王之下蓋欲
復古之制今者皇子嘉王封拜云初而臣等資望既非
宋琪之比視韓琦輩又無能為役倘仍舊貫實不遑寧

欲乞序班在王子之下庶幾稍協古誼如蒙聖慈俯從

所請即乞批付閣門施行取進止

當日御批皇子嘉王某官品自有定制班

位當在宰輔之下所請宜不允

謝除少保表

臣某言伏奉制命授臣少保益國公加食邑食實封累具辭免伏蒙聖慈特降中使賜臣批答不允仍斷來章者天開禹績親承歷數之傳德愧尹躬叨被保衡之拜控辭弗獲祇受為慚臣某中謝臣惟祖宗之盛時多卿

相之舊德勛業光於簡冊聲名重於朝廷正唯爵位之
高允謂事功之稱如臣不肖敢企前修曾微一善之稱
偶際三朝之盛麟臺憲府早蒙高廟之親除螭陛綸闈
常侍壽皇之初政晚被中台之數再逢內禪之期首告
大庭超加異渥念覃霈自近司而始稽舊章無回授之
文跼躅拜嘉忸怩就列茲蓋伏遇皇帝陛下乾飛有作
離照無疆憐臣昔備宮僚久承恩獎謂臣今居宰席密
佐聖明特厚寵華式昭榮遇統百官而均四海已知任

職之難曰三孤而弼一人常究名官之義未知報塞徒
誓糜捐臣無任云云

謝重華宮表

臣某言伏奉制命授臣少保益國公加食邑食實封者
執舜禹之中游敷大慶申臯夔之命首沐鴻私拜賜兢
營省躬戰栗臣某中謝伏念臣猥由孤賤獲際盛明辭
州縣之徒勞備師儒之遴選當紹興末綴臺諫之清班
暨內禪初預禁嚴之密侍寅緣簡擢揚歷高華戴恩憐

則山嶽為輕課績效則絲毫奚有旋叨大任遂陟冢司
惟三聖相承曠萬年而幾見顧老臣何幸閱一世而再
逢數正元朝士之無多念魯國靈光之獨在是容躡等
有愧踰涯茲蓋伏遇至尊壽皇聖帝陛下盛德難名成
功不處父有天下得神聖以親傳王居域中與乾坤而
同大眷茲駕鈍被以龍光況臣輔政十年受知最厚名
官三少在列所稀既未能退避於賢才又不獲日親於
間燕惟勉殫於臣節期力贊於君仁翼翼之思諄諄於

是臣無任

辭免講堂轉官回授劄子

四月十九日

臣伏蒙聖慈以臣曾任東宮講堂官依三月十七日指
揮轉兩官許回授者伏念臣頃聯禁從獲侍承華恩遇
最隆略無補報今值陛下龍飛九五潤澤萬方興念舊
僚許以延賞是謂非常之幸會百世之異恩但臣備位
宰司叨塵已厚可以無取豈容傷廉欲望聖慈特寢成
命庶於分義或可少安干犯天威臣無任戰栗俟命之

至取進止

奉御寶批
降詔不允

不允詔

倪思撰

勅某云云具悉卿昔以淵源之學導朕於承華今以
經濟之才佐朕之初政功既各異賞宜屢加姑俾馳
息曾非過寵尚茲固遜殊弗至懷亟膺延世之休益
盡教忠之義所辭宜不允

辭免轉官公據劄子

臣近準省劄緣吏部以臣曾兼太子詹事具在東宮請

堂官項目內例轉兩官許回授臣即隨衆具奏辭免伏
蒙聖慈降詔不允方欲再陳乞間今日吏部已給到公
據一道臣竊思講堂官專為曾講經讀史之人臣昨來
止是備員詹事其於講讀未嘗宣勞難以一例祇受此
理甚明欲望特降睿旨許臣繳納上件公據庶協於理
伏取進止

奉御寶批降詔不允不得再有陳請

不允詔

勅某云云具悉朕念羽翼之舊勛厚股肱之殊眷勉

徇辭官之請故加貶子之恩已抑朕懷曲成卿美雖
謙言之渚至顧大義以難從宜即欽承勿庸屢遜所
辭宜不允不得再有陳請

辭免親饗禮儀使支賜劄子

臣昨者伏覩親饗太廟都大主管所奏審支賜銀絹數
內禮儀使三節次各支七十兩正臣嘗面奏無功受賜
乞行寢免已荷天恩曲從所請即已貼去今準結絕所
傳奉聖旨依舊齋到賜目實不違安欲望聖慈依已得

指揮許免祇受干犯宸嚴臣無任戰懼之至取進旨

奉御

批不須多辭
可特收受

乞去劄子

五月六日留身

臣輒傾丹悃上瀆宸嚴臣以至愚極陋之資遭時遇主
致位二府月征日邁遂閱十年方為疑丞循默隨眾已
負素餐之罪暨升次輔彌覺技窮爰自去冬懇祈罷免
恭值壽皇聖帝將舉內禪未容遽去亦嘗奏知祇候三
數月間復申前請粵自陛下乘乾出震睿智日躋正藉

宰司奉承教令俾羣臣宿道鄉方於內萬民一新耳目於外然後治功可致聖德有光今臣乃以衰疲庸謬之人玩歲愒日妨碍賢路仰辜陛下大有為之志公議籍籍久矣臣雖欲自恕其可得乎幸今親饗訖事使命成禮量能引分允也其時伏望陛下念邦棟之非輕察凡才之無用因其自列許奉外祠庶於去留之間明示意旨自然人心奮勵立懦廉頑初政急務孰大於此觸冒天威臣無任戰灼俟命之至取進止

乞去奏狀

五月六日晚附中使

右臣今早於榻前控叙危懇乞解機政願就外祠非敢
率然有言遂欲輕去軒陛實緣揣分量才既難任重又
當陛下政令維新久妨賢路恐悞國事所以決為退休
之計伏蒙聖諭諄諄未賜矜許一日之間三勤宣押前
無此例臣惶懼感激自當仰承威命詎免就職但以輔
臣舉措實係國體條去忽留近於要君一致人言萬死
莫贖欲望聖慈特回宸慮早賜俞允臣以表章不得通

輒附勅使恭述忱悃且致再三之瀆臣來日亦未敢赴
朝參不免家居俟命臣無任虔祈激切之至謹錄奏聞
伏候勅旨

御批

卿久輔慈皇茂紓賢業茲求新政之益實賴舊弼之
臣遽上謙章曷副眷意

再乞去劄子

五月七日

臣昨具奏乞解罷機政伏蒙聖慈四遣中使宣押仍賜

親札備形嘉獎眷留之意者伏以迫切之詞願還相印
丁寧之諭特錫宸章隆體貌以有加過囊封而莫達恭
趨法座洵布危衷臣聞立政之初用人為本以明而陟
當隆赫赫之瞻有過則徵敢作容容之計矧在官僚之
首當知進退之方伏念臣本乏才能可膺任使徒緣際
會遂忝輔弼逡巡歲月之多積累愆尤之衆應酬庶務豈
能事事以協宜甄叙羣才安得人人而盡善動常招於
指目居每畏於譏評抱此兢慚凜乎朝夕憶壽皇之初

政倚康伯之舊臣曾未幾時猶辭大任矧微臣之無似
豈前比之可忘雖復少留迄將何補懼妨賢而悞國非
避事以謀身伏望皇帝陛下奮勵剛明照知情實既顯
周邦之新命更憐秦府之舊人如公器之傍牛與天閑
之駑馬久經服御今已衰疲姑全刀几之餘生任適山
林之野性茲惟大惠敬後俞音干犯天威臣無任激切
俟命之至取進止

再乞去奏狀

經濟之才語言輕易非廊廟之具自叨大任衆論弗與
街談巷議雜然議之搢紳公言亦可想見臣宜去三也
聖明御極日新庶政易置輔臣古今常理壽皇初載陳
康伯尚不敢久留而況臣乎早蒙聖諭謂康伯求去月
日不如是之速蓋是時康伯獨相又有人望所以稍緩
今右揆賢德中外具瞻而臣望實不孚每招議論幸親
饗託事使容成禮正當策免已備列於初奏臣宜去四
也今春蒙壽皇曲留即嘗奏知勉強數月輔陛下之初

政即避賢路今當踐言難復固位臣宜去五也凡此五者並非飾辭何待臣言難逃聖鑒惟有二事亦合詳奏臣備數東宮閱歲滋久既陛下諄諄以為諭在臣豈無戀主之心然而當軸處中非恃恩之地尸祿素餐或致彈劾陛下雖欲不加譴斥如公議何孰若因其有請保全終始以重國體此一事也其一事則自右遷左賜位特進實為僥倖但以條例當然不敢獨辭未幾陛下登極首叨覃轉遂冒孤棘又緣累朝故事此恩無終辭之

理不免汗顏祇受今若奉身而退則名器豈容虛假倘蒙聖恩幸許其去只乞以原官奏祠猶可少弭人言粗安分義臣之肝胆盡於此矣伏望天慈早賜處分施行謹錄奏聞伏候勅旨

辭免除職判潭州劄子

五月八日

臣近疊具奏乞罷政奉祠今聞已降制命除臣觀文殿大學士判潭州臣誠惶誠恐不知所措竊惟秘殿隆名長沙鉅鎮兼舉以授必惟其人如臣者任職居官碌碌

無補迫於衰病仍懼滿盈引分丐閒良非獲已敢謂陛下曲全體貌眷撫有加纔兩日間宣押再四惟茲異數近比所稀今又加職典藩寵榮其去在聖主禮意則厚矣恩德則深矣愚臣自揣其何敢當所慮招致煩言仰辜鴻造伏望聖慈收還成命止授外祠庶令進退之間不失辭受之義干犯宸扆臣無任戰栗俟命之至伏取
進止

不允詔

倪思撰

勅某云云具悉朕待遇股肱優禮體貌既懇辭於重
任必寵賁以徽章非惟答其輔贊之勞亦以光其進
退之節卿朕之舊學國之元臣四近周旋宣勤踰於
十載兩朝授受策勛茂於一時茲解繁機爰加異數
峻延恩之秘職專帥閫於上游庸便乃私且榮其去
丞膺渙渥宜略謙撝所辭宜不允

再辭表

臣某言近具奏辭免新除觀文殿大學士判潭州恩命

伏蒙聖慈特降詔書不允者保全其去已銜莫大之恩
寵賁其行敢冒甚優之禮雖溫言之俯暨終危慮之難
安臣某中謝伏念臣本乏寸長叨聯近弼當聖主初承
於丕緒審愚臣絕企於清光懼干誤國之誅亟上乞身
之請陛下厚黃闈之深眷記青宮之舊僚留臣非不堅
待臣非不至其如內愆私義外畏公言縱欲強顏抑將
何補茲用數塵於淵聽庶幾俯鑒于精誠方當覆餗之憂
詎意觸藩之吉豈謂伏蒙皇帝陛下仁心恤隱聖度包

荒拔之險陷之途置之安寧之地其為感德固已淪肌
至於通籍殿中分麾閭外極輔臣之異數須元老之壯
猷猥被妄庸定貽顛沛願勅還於前詔姑幸畀以外祠
身在江湖縱復去天之達忠存猷畝猶肩報國之心重
此陳詞期於遂志臣無任

同日奏劄

臣今年正月壽皇聖帝欲移御重華宮委臣討論典禮
面許錫賚昨日蒙差使臣齎賜酒器二百兩并清馥薰

夜香共五十貼新茶兩種臣不敢辭免即已祇受本俟
朝辭日敷奏今既聞言官論列恐未必得望清光合具
奏知仰乞睿照

重華宮奏劄

五月八日

臣迂踈駑下積緣幸會一自壽皇聖帝陛下初臨大寶
即蒙擢侍螭坳由是封植任使徧歷華近以至二府天
地之恩莫可量度正使碎首捐軀安能圖報萬一近者
陛下決策內禪凡百典禮盡出睿謨臣偶備宰司預聞

意旨初無一語可助討論今緣輔政非才乞解機要兩朝大恩未酬毫髮非敢潔然而去實由衆論不容恐滯至煩言有傷國體姑欲自為去就豈謂聖慈記向來欲加錫賚之語親御翰墨申畀異數尚方金器御府香茶皆非微臣之所當得君賜至重不敢輒辭惟當退夸閭里以侈榮遇傳之子孫世世報德臣見今辭免新命候三數日間朝辭面奏皇帝乞詣宮謝辭尚望矜念犬馬舊臣許賜宣引臣無任瞻天荷聖感激惶懼之至

乞以元官奉祠并免謝辭劄子 五月九日

臣已具奏辭免加職典藩見在城外恭俟威命尚有忱
悃須至奏陳臣乃者備位輔臣適緣幸會值陛下倂臨
大寶叨冒覃轉進位亞保臣固嘗懇辭六七曲蒙聖訓
丁寧必令祇受臣亦檢照累朝典故惟此非常異恩宰
司無回授之例雖已承命每不自安今既得請罷政乞
還此官於理無嫌欲望聖慈祇令以舊秩奉祠庶安愚
分所有謝辭一節緣臣罪戾至多深恐言者攻擊未已

必疑臣朝辭之日妄有陳述仰惑聖聽臣將無以自明
愈重其罪伏乞併賜處分施行取進止

五月九日御批
免朝辭在外宮

觀任便
居住

謝除醴泉觀使表

臣某言伏奉勅命差臣充醴泉觀使在外任便居住臣
已望闕祇受遙謝訖者用踰其分宜涕民瞻詔許其歸
尚均祠佚恩與天而同大感無地以寄言臣其中謝伏
念臣猥以妄人逢昭代不自量其才力乃過竊於寵

榮久合投閒夙嘗控請屬飛龍之聖作疇不歸心雖老
馬之力疲詎忘戀主少需三月方敢一言悞蒙英睿之
知優假弼諧之禮王人疊至親札下頒凡可示於留行
已畢全於故實逮清議弗容之際猶隆私未替於初所
愧冥頑仰辜化育茲蓋伏遇皇帝陛下待人以恕馭下
惟公念臣早侍元良深致保全之意知臣自貽衆怒難
專予奪之私聽辭湘水之麾俾領祥源之使擢髮不足
以數愚臣之罪捐軀不足以酬聖主之仁惟憑香火之

緣上祝乾坤之筭臣無任

重明節開啟疏

天祐聖神方啟萬年之祚人輸頌禱敬歸兩足之尊矧
誕節之肇臨宜勝因之多祚皇帝陛下伏願功高文命
養備重華中國有至仁舉梯航而畢集西方無量壽極
筭數以難名臣無任

重明節進功德疏右語

天開昌運時誕明君嘉節倣逢輿情胥忭披三旬之釋

典祝萬載之堯年皇帝陛下伏願道冠百王功成一統
河沙可數大福無窮歷象易推脩齡難測施及華夷之
衆同躋仁壽之期臣無任

重明節賀表

臣某言伏以嵩呼萬歲俶臨萬宇之朝日近重陽肇立
重明之節邦家大慶夷夏同歡臣某中賀恭惟皇帝陛
下德冠古初仁周品彙將旦而羣陰伏寢以明昌得秋
而萬寶成俾茲熾大自今伊始有億斯年臣久沐鴻恩

驟違丹陛夢尋園綺猶進旅以陳篇目斷夔龍阻隨班
而上壽第堅請祝實倍常均臣無任

重華宮會慶節功德疏右語

伏以積二十七祝之仁恩民誰不被享億萬斯年之鴻
筭理有必然茲因誕節之臨更效封人之祝至尊壽皇
聖帝陛下伏願與天無極如日常中金母長生永對慈
闈之養玉卮稱壽坐觀聖主之朝臣無任

重華宮會慶節賀表

臣某言恭遇十月二十二日會慶節者伏以褰裳高蹈
仰黃屋之非心繞電載臨效華封而祝聖雖曰雲天之
遠居然葵藿之依臣某中賀恭惟至尊壽皇聖帝陛下
御衆以仁事親惟孝委成功而弗處玩至道以自怡九
重備養而儉德愈彰太極彌尊而謙光滋著昔君一或
得此尚為有道之長今我兼而行之宜享無疆之壽臣
屏居外郡欣際昌辰望東內以馳情指南山而申頌臣
無任

冬至節賀表

臣某言伏以七日之來禮方隆於亞歲萬年之祝時正
紀於初元居然有截之區同此無疆之頌臣某中賀恭
惟皇帝陛下得天之統如日之常治格豐年何待占雲
之邈人安化國自應測景之長陽德方亨聖圖益廣臣
奉祠跡遠存闕心勞雖獸舞之無階在葵傾而敢怠臣
無任

文忠集卷一百三十

欽定四庫全書

集部

文忠集卷一百三十一至
三

詳校官庶吉士 李傅熊

主事 臣 呂雲棟覆勘

總校官進士 臣 楊懋珩

校對官學正 臣 李 巖

謄錄監生 臣 蔣繼煥

欽定四庫全書

文忠集卷一百三十一

歷官表奏十

宋 周必大 撰

紹熙元年

年節賀表

臣某言伏以陽遇三而成泰時謂人正聖以一而為元
肇新歲紀羣方來賀庶物皆春臣某中賀恭惟皇帝陛
下以德施仁順時布治始初之政應天地之發生寬大

之書協祖宗之溫厚明繼明而方永朔復朔以奚窮臣
驟遠獸搏倣更鳳歷夢想臚傳之禮阻陪特揖之班徒
竭寸誠仰祈萬壽臣無任

重明節祥符寺開啟疏

電繞紫樞啟真人之震夙經繙紺宇集妙果之莊嚴是
資彌月之勤庸効後天之祝皇帝陛下伏願壽隆無量
福極難名轉聖王之四輪咸依天覆歷賢劫之千佛永
保君臨

重明節天慶觀開啟疏

帝圖有永逢上聖之膺期道力無邊紓下情而致禱集
琳宮之淨侶慶甲觀之昌辰皇帝陛下伏願如日照臨
體天覆燾壽考越萬年之久子孫開千億之繁夏清冬
溫永奉北宮之養丁躔丙度常占南極之祥

重明節進功德疏右語

祝聖者三華封尚爾俾壽之萬魯史猶然矧嘗密侍於
清光茲幸親逢於誕節罄丹衷之切至期鴻算之延長

皇帝陛下伏願如佛獨尊與天同大三千爾闕咸歸有道之邦億兆斯民共洽無為之化丕隆親養彌永皇圖

重明節賀表

臣某言恭遇九月四日重明節者伏以卿雲彌館夙開三日之祥瑞露承囊載紀千秋之節兩宮胥慶羣辟交欣臣某中賀恭惟皇帝陛下保合太和綏寧中夏脩文偃武運天地之仁心薄斂省刑傳祖宗之家法積此無窮之澤儲為有美之休齊久照於羲舒邁永年於箕翼

臣早塵附鳳今際流虹屏迹江湖第遙瞻於太紫積心
香火竊自比於緇黃

重華宮會慶節進功德疏右語

天錫慈皇之壽以莫不增民懷聖父之仁其何能已虔
敷秘典仰贊昌辰至尊壽皇聖帝陛下伏願以無為之
化丕冒厚生以不宰之功常居太極列真千佛共儲有
羨之齡諸夏百蠻永效無疆之頌

重華宮會慶節賀表

紫禁高居受寧親之至養赤光下照標誕聖之初期允
在含生舉深善頌臣某中賀恭惟至尊壽皇聖帝陛下
仁明毓德揖遜成功瑞虹符壽母之祥寶婺肇曾孫之
慶載臨令節丕洽宸歡冕旒初奉於瑤卮方藏萬年之
盛郡國椒均於鎬晏益彰二紀之謙臣身也奉祠心焉
存闕徒因彌月之旦申詠後天之詞臣無任

冬至節賀表

臣某言伏以剛為天德既反則亨陽主歲功其來為復

遍觀道長胥慶君臨臣某中賀恭惟皇帝陛下圖大宅
中順時布政仰占乾度會七曜於太初俯應人和合八
能於前殿無疆之祝有截所同臣名玷內祠身縻寒谷
企望堯雲之遠欣逢舜日之長臣無任

辭免判隆興府劄子

臣今月二十日準尚書省劄子十月二十七日三省同
奉聖旨周某可判隆興府免奏事疾速之任臣聞命震
恐無地措躬伏念臣庸愚不肖本非可用之才而冒恩

最久受任至重不能悉心竭力徒知竊位素餐日徃月來臯累山積向非陛下念其簪履之舊力賜全身則臣螻蟻微生當膏鈇質豈容尚尸厚祿安處故里日夜慚懼無以仰副天地父母之隆施今者特蒙收拭畀以藩方恩旨一臨如蹈淵谷深惟上流重地選用非輕如臣負罪嬰譴加之素有心氣之疾年齡遲暮浸以昏忘驟臨民社必速顛濟量力自言非敢備禮伏望睿慈俯矜誠悃亟收前詔上以全聖主始終之賜下以免微臣冒

昧之誅未泯餘生別圖報効臣無任虔祈激切戰栗俟命之至取進止

貼黃

臣重念豫章督府難久闕守緣臣聞命辭免已越累旬決無冒受之理欲乞便賜俞允免致再瀆威尊有妨謀

帥臣不勝幸願

十一月十一日
御批降詔不允

不允詔
倪思撰

勅某云云具悉遠稽周室之用賢有若召公之為保

明南國之教所以宣德澤而旁流分西陲之權所以
強形勢而內輔乃今謀帥視昔同符求諸九棘之班
付以十連之寄謂宜即日以之鎮尚且抗章而力辭
惟時价藩難久闕守其稟已行之命亟慰來暮之思
所辭宜不允

年節賀表

臣某言伏以七政旋觀爰接龍杓之宿二儀交泰重頌
象魏之闕

緩星拱臣某中賀恭惟皇帝陛

下懋昭聖治推廣仁心百姓羣黎均被發生之德五戎
六狄咸依覆冒之恩受福無疆降年有永臣久茲伏隩
邈矣造庭但同皞皞之民共樂熙熙之化臣無任

再辭免判隆興府第二劄子

臣近具奏辭免判隆興府恩命正月二日恭奉十二月
十二日詔書所辭宜不允者臣稽首祇拜以還感極至
於流涕自當欽承威命即日啟塗庶因藩宣圖報萬一
實緣臣衰年抱疾力不能勝是敢罄竭腹心游于淵聽

伏念臣奮身鉛槧本無才畧受爵不避遂至超踰粵自
投閒以來追思平昔叨竊過分毫髮無補常疑天刑人
禍難乎幸免追聞起鎮將恐將懼心氣宿疾因此轉甚
而又寒入腰膂步履艱窘飲食減少日就羸瘠稽留詔
書無地措躬假令扶憊赴官以競憂之心強疲懦之質
凡所施設決至差謬上流重鎮豈容養疴何待旬月定
干大戾在臣既乖不能者止之誼又使一邦徒費將迎
其罪愈不勝誅矣臣亦仰揆聖意或以臣嘗侍左右誤

被簡知不欲使之久間特畀鄉部以示光寵是陛下施
惠於臣者至深至重苟非心勦形瘵如前所陳則臣何
敢固為辭避抵冒嚴譴伏望聖慈深賜矜察即降處分
許臣仍舊奉祠脫之進退惶迫之中置之保全安佚之
地此為恩德胡可勝陳碎首捐軀尚期異日黷犯天威
臣無任戰栗俟命之至取進止

允詔 倪思撰

勅某云云具悉入居輔弼出任藩宣大臣之職也卿

上相印而奉祠館再更歲籥朕念其久間起鎮鄉郡
恩遇之渥謂即欽承抗章控陳却而復至情辭懇切
弗從得乎勉徇雅懷不忘眷注所辭宜允

繳勅書銀合臘藥狀

右某昨準進奏院遞到勅書一道賜銀合臘藥係是前
宰執判隆興府江西安撫使恩數緣當時辭宜允謹免
恩命未敢祇受已權寄吉州軍資庫今來已奉詔書所
辭宜允謹具狀中尚書省乞賜敷奏將上件勅書銀合

臘藥赴所屬繳納伏候指揮

重明節進功德疏右語

右伏以天錫明君丕享萬齡之算人歸聖德咸輸三祝
之誠假梵釋之薰脩助海山之深峻皇帝陛下伏願自
彊法乾之健久照如離之明重譯效於貢珍兩宮隆於
榮養域中而王居一執道紀以長生天下而我獨尊等
佛身之無量臣無任

重明節賀表

大火德炎是生真主重陽節邇載紀誕辰罄夷夏以來
同與乾坤而等久臣某中賀恭惟皇帝陛下道齊堯舜
功邁禹湯發於言者罔非仁言施於政者無非仁政是
以兵寢刑措編氓舉安時和年豐生齒日衆積億兆人
之就望宜千萬歲以熾昌臣攀附有初禱祈滋切容光
日照雖悵於戴盆所欲天從竊同於窺管臣無任

重華宮會慶節進功德疏右語

右伏以燃無盡之燈允符久照按長生之籙敬卜後天

凡戴德之斯民舉竭誠於是日至尊壽皇聖帝陛下伏願鴻基益固睿算彌增三面網開何取唐宮之獻太元筴授永觀漢殿之庖臣無任

重華宮會慶節賀表

日會析津夙推良月星流華渚慈應昌期凡居有截之區同慶無疆之祝臣某中賀恭惟至尊壽皇聖帝陛下功成弗處道大難名不獨親其親孝與慈而並廣為衆父之父理暨性以兼融巍然太極之尊永矣溥天之養

聖謨可頌睿算難窮臣竊伏江城欣逢誕節望重華之殿旅百何從想萬壽之山呼三罔怠臣無任

辭免除觀文殿大學士判潭州劄子

臣九月六日準省劄八月十一日三省同奉聖旨周某可除觀文殿學士判潭州龍光狎至榮懼交深臣仰惟秘殿之職有三紫宸居首大藩之名不一南楚為雄惟譽望素高者許綴其班惟恩威兼著者始堪其任如臣抱虛竊寵浮實起羞進無可施之能退有未補之過獨

荷聖心之簡記無紆皇眷以慈憐方辭鄉部之麾又畀鄰封之帥更聯禁直加賁頽齡顧私心猶不自安在公論必難衆允伏望陛下垂矜舊物深鑒危衷曲全終始之恩特寢便藩之命間官厚祿願樂於聖慈異數名邦免妨於賢路所有除命臣未敢祇受冒瀆天聽臣無任

云云取進止

奉御筆批
降詔不允

不允詔 李燾撰

勅某云云具悉朕崇咨舊輔寵遇碩儒秘殿隆名所

以增華於賢望南邦雄鎮所以倚重於英猷卿夙秉
機衡久安館圉茲藩垣之申命尚函牘之懇辭夫臣
嘗作於股肱何靳四方之宣力且治已均於邦國奚
難九牧之身民矧如洪化之訐謨式稱延恩之優禮
誼無可避令在必行往亟體於開懷庸勉圖於美績
所辭宜不允

再辭免劄子

臣近具奏辭免新除觀文殿學士判潭州恩命伏奉九

月二十日詔書所辭宜不允者聖恩天大負荷已難詔
旨春溫兢榮滋劇伏念臣以百無所堪之才而久竊甚
高之位以萬分未報之德而更受非常之知苟可效勤
殺身奚憚今者畀之美職付以名藩任使優隆豈應辭
避緣臣去冬特膺宸眷起鎮豫章自度無方面之才有
心氣之疾物情未與顛沛是虞疊控忱誠願安閒散乞
蒙從欲賜以保全僅歷三時復頒異數隆恩加厚衆或
無他然臣揣分量才自當知止况始終忝竊既殊先迷

後得之義而衰病侵陵又非昔疾今愈之時倘冒寵光
必貽罪戾伏望陛下察臣行能之無取憐臣筋力之既
憊不以名器假非其人不以藩幹授非其任收還誤渥
改命實才未隕餘生必期稱塞臣無任云云取進止

奉御

筆批降
詔不允

不允詔倪思撰

勅某云云具悉卿上相印之初朕固嘗寵以紫宸峻
職畀之南楚帥權矣維今之除蓋申前命既本朕之

始意無復人之間言比覽遜章已詳諭旨謂開藩之
云久何引道之尚淹且卿昔力辭猶為有說茲焉固
避是乃過謙勉煩寅亮之賢徃重方維之望亟其之
鎮宜止控陳所辭宜不允不得再有陳請

三辭免劄子

臣近兩具奏辭免觀文殿學士判潭州恩命疊蒙聖慈
降詔不允不得再有陳請者臣自惟犬馬餘生何以當
天地曲成之造如此蓋陛下記臣頃因罷政嘗有是除

俯眷舊人迄申前詔臣既合仰體德意又長沙闕守已涉
累月今來已不敢辭避見一面起發之任惟是殿惟列
職近臣高選方茲起廢異乎勸功况臣祿秩已優足假
寵以臨民吏豈應更冒殊渥自招滿溢之灾欲望皇明
照臣悃悞特頒睿旨姑寢除職之名俟他時治郡不至
瘵曠然後賜以褒陟則公朝予之為有名微臣受之為
有說免今非據或致疾顛屢瀆天威臣無任震懼祈懇
之至伏取進止

十一月十四日三省同奉聖旨
依已降詔不允不得更有陳請

冬至節賀表

敬奉天時順周正而發政躬脩郊報即漢時以陳儀喜
浹華夷恩漸動植臣某中賀恭惟皇帝陛下懋昭仁孝
獨運聖神百姓德教之加灼知聖治萬邦豐年之屢永
底農功履陽復之昌辰介天齊之曼壽臣久遠班列屬
剖藩符第同富庶之民共樂舒長之景

郊祀禮成賀表

臣某言恭聞郊祀大禮慶成者三歲親祠雖存彛制一

純自荐尤在初郊犗大典之告成紛郡方之來賀臣某
中賀臣聞中和立極然後禮樂可以格神德政養民然
後染盛可以事帝是為中外之相應豈特儀容之可觀
恭惟皇帝陛下躬堯舜之仁懋禹湯之儉省刑以彰王
化薄斂而裕人生肆迎景至之長丕闡國南之祀歸功
高廟預殫尊祖之誠獻胙慈庭亟展事親之孝情文交
舉古昔罕聞臣祇赴侯藩欣逢邦慶端闡肆青班草綴
於朝紳宣室受釐夢徒游於帝席臣無任

潭州謝上表

臣某言先準告命除臣觀文殿學士判潭州已於十一月二十日到任交割職事訖者除音中出兼內朝外間之榮詔旨下頒趣新組舊封之拜戴洪私之浩蕩即便道以馳驅俶見吏民敬宣德意臣某中謝伏念臣初微一善獲事三朝高廟疑其有小才儲之臺閣壽皇察其無大過試以鈞衡會宸極之天臨念宮寮之歲久弼予新政咨汝舊人而力不逮於初心望不孚於衆聽懇辭

鼎軸隨困風波蒙全度之深憐竊優閒之厚祿桑榆景
逼惟甘嬰疾於清漳葵藿心傾未忍掛冠於神虎詎期
軫記頻下恩章姓名復齒於殿帷委寄仍還於湘部謂
昔之鋪印重違白筆之公言今者剖符明示清衷之本
意跡類馬門之復臺成鹿野之真載揆衰殘若為稱塞
茲蓋伏遇皇帝陛下用人由已篤舊惟仁吉庚巽命之
申晝日康侯之錫餅嬰雖溢猶施挹注之功牛馬已疲
尚脩服乘之數臣敢不思酌睿獎勉布寬條豈能待三

年而有成或庶幾一日之必冀在前智畧悵徃謬之難
追治郡功名期後圖之允懋臣無任

郊祀謝赦表

臣某言準都進奏院遞致赦書一道為郊祀禮畢大赦
天下臣即時集本州官吏軍民望闕謝恩宣示施行訖
者肇裡三歲丕昭莫大之儀肆青萬方誕布惟新之澤
若民與吏式舞且歌臣某中謝臣聞好生者上之所先
多辟者下或不免堯舜衣冠之畫教猶弼以五刑成康

圜圉之空法亦施於三宥於皇昭代尤廣惠心率於大
祀之竣隨以龐恩之施恭惟皇帝陛下精誠內罄法度
外彰欽崇郊廟之文丕冒華夷之衆福其錫汝敷皇極
於箕疇過曰在予富善人於周賚惟道以德故有恥可
格惟協於中故無刑可期臣久侍威顏灼知聖意甫效
駑才於方岳適逢鴻霈於園丘誓殫宣布之勤仰副緝
熙之美臣無任

郊祀禮成謝加食邑表

臣某言伏奉制命以郊祀禮成加臣食邑一千戶食實封四百戶者分土武安阻侍壇垓之饗宣麻文德首叨井地之加省已無勞拜恩有覲臣某中謝伏念臣奮由羈賤積冒寵榮氓受一廛本為於織席侯封萬戶方極於布衣茲逢祭澤之行更衍封租之入此蓋伏遇皇帝陛下事天寅畏馭下寬仁單誠意於初郊均神休於率土雖在江湖之遠亦頒綸綍之新承惠長沙敬想孝文之問稱忠甲令敢希吳芮之賢臣無任

高宗加上謚號賀重華宮表

臣某言伏觀都進奏院報十一月二十四日加上高宗受命中興全功至德聖神文武昭仁憲孝皇帝徽號冊寶闕成者肇講郊禋追崇祖德垂鴻一世底豫三宮几在照臨惟胥鼓舞臣其中賀臣嘗博稽盛帝疇若高宗異時德壽之宮屢增鴻號今日頌成之廟益荐徽名恭惟至尊壽皇聖帝陛下揖遜功高顯揚志切歷數闕禹坐觀子述之明羹墻見堯居致時思之孝茲邦儀之告

備宜聖意之允諧臣分土攸居班庭莫遂逖傳盛典徒
驚寸心臣無任

賀皇帝表

臣某言伏覩進奏院報十一月二十四日加上高宗受
命中興全功至德聖神武文昭仁憲孝皇帝徽號冊寶
闕成者我祖萬邦之君名已昭於太室先庚三日之吉
號復衍於初郊緝禮時成含生風動臣某中賀高宗皇
帝受天明命享國永年解三萬言難盡放勲之稽古加

十六字將同藝祖之開基恭惟皇帝陛下寅紹邦圖顯揚世烈合華夷之公願闡今古之彌文涓休假廟之前具嚴典冊展慶受釐之後底豫神人臣祇役蕃宣逢辰昌盛莫預鋪張之列惟思希曠之儀臣無任

賜銀合臘藥勅書

倪思撰

勅某卿國均舊秉帥閭新臨當凝凜之屆期宜冲和之加惠俾頌珍劑庸示眷懷今賜卿銀合臘藥至可領也故茲示諭想宜知悉冬寒卿比好否遣書指不

多及

謝表

臣某言準都進奏院遞到勅書一道賜臣銀合臘藥臣
已望闕遥謝祇受訖者雲童封璽寶劑實奩適屬疑嚴
頓蘓疲瘵臣某中謝伏念臣甫從閒散起備蕃宣雖恪
守於官箴曾未除於民瘼豈圖宸渥爰舉邦彛詔塗芝
檢之黃光於下澤藥按桐君之錄滋以上池手披出綈
之温心失折綿之凜此盖伏遇皇帝陛下慈憐臣庶軫

念藩維已施起廢之功更廣蠲痾之賜恩勤至矣報稱
謂何臣謹當因六尚之珍良察一方之疾苦乃身無恙
敢獨享於君仁所部有瘳期咸沾於聖惠臣無任

賜紹熙三年厯日宣

太史局進納到紹熙三年厯日今賜潭州守臣

右宣令潭州守臣準此

紹熙二年十一月二十四日

謝表

臣某言準都進奏院遞到敕書一道賜臣紹興三年歷日一卷已望闕謝恩祇受訖者閏月定四時爰及三年之閏春秋大一統是頌萬國之春稽首窺天悉心布治臣其中謝恭惟皇帝陛下璣衡齊政厯數在躬歲更始以專農明昭先務王求端而得正誕著新書將令志慮之孚豈獨典常之舉若時宣化屬在守封臣敢不仰體聖心俯勤民事天監厥德方婁格於天心職思其憂當益加於勸課臣無任

紹熙三年

年節賀表

臣某言伏以元會葢儀仗入龍樓之曉孟陬占象歷新
鳳紀之編夷夏來同堪輿協慶臣某中賀恭惟皇帝陛
下秉乾之健出震而亨孝備愛欽浹三宮之和氣書頒
寬大轉四海之仁風於萬斯年自今以始臣久違班著
俶布藩條春見曰朝徒想北辰之拱閨餘成歲敢稽東
作之平臣無任

問聖體劄子

臣恭聞去臘之初皇帝陛下暫親藥餌隨喜康和既獲
助於天人宜駢臻於祉福臣身縻符竹夢想闕庭望天
日之光莫陪朝列見羽旄之美更想都人謹具手劄起
居以聞伏乞睿照

賀御殿劄子

臣比者恭聞皇帝陛下膺理之間節宣微爽神明所相
今已痊平日御延和裁決萬務無疆之慶有截同歡臣

伏限守郡在遠不獲蹈舞闕庭臣無任

辭免復觀文殿大學士劄子

臣竊覩進奏院報已降制命復臣觀文殿大學士者恩
光滋厚愧恐兼深伏念臣頃去周行嘗叨峻職審僉諧
之弗契因懇避以獲從逮起鎮於藩方併通班於殿陛
超踰已甚褒陟則那載惟有道之朝詎假無名之寵謂
臣偶經郊霈則已䟽千戶之封謂臣忝佩郡章則未奉
三年之計及復敢當於大號初終蓋守於小康伏望皇

帝陛下重爵秩以觀功謹器名而馭下念昔者本非宜
得在今茲何以復還鑒多懼之危衷收再頒之渙渥身
聯禁籍尚奚假於升華名洗刑書難更膺於進律所有
復職恩命臣未敢祇受干冒疏宸臣無任兢惶俟命之
至取進止

不允詔 李嶽撰

勅某省所奏劄子辭免復觀文殿大學士恩命事具
悉朕矐懷元老寵遇鴻儒任重帥藩方懋股肱之力

班穹書殿蓋昭體貌之恩卿學興器宏望瓌寶茂自
釋秉鈞之勩荷膺宅牧之求惟紫宸肇創於隆名在
皇祐本優於舊相矧貳公夙建蓋華職之兼崇而明
旨久頒偶遜章之曲徇茲申成渙亶協僉言當祇服
於顯微尚奚煩於撓挹所辭宜不允故茲詔示想宜
知悉夏熟卿比平安好否遣書指不多及

辭免復觀文殿大學士表

臣某言近蒙聖恩復臣觀文殿大學士尋具奏辭免準

進奏院遞到詔書一道所辭宜不允者恩隆申命加一字之袞褒禮重馭臣下十行之璽札將力回於譎寵敢遞止於牢辭臣竊以文殿大名儒紳異數他學士皆為隔品今朝廷方且虛員孰謂畸人獨叨睿獎伏念臣積塵美仕久負殊知尸祿素餐在宿愆而莫蓋牧民御衆曾來效之未伸寵靈驟降於叢霄震懼實深於丹臆雖君制命而臣承命當即拜於絲綸然天虧盈而神害盈合游殫於悃幅伏望陛下力持公道參考私情收渥

於已行免疾顛於非據倘異日曠瘵之或追則盛時勉

勵之有名恭布忱言伏須允報臣無任云云

奉御筆批
降詔不允

不得再
有陳請

不允詔 李燾撰

勅某云云具悉冠榮秘幄盖孚中外之瞻優寵舊鈞
尤繫重輕之體卿以真儒之學濟上賢之才藩閩雖
分心固存於廊廟謨猷益著眷宜厚於臣工茲繇華
職之陞屢覽冲章之至謙德之柄在雅志以甚高名

實之賓豈公朝之敢廢其承深詔勿復牢辭所辭宜不允

謝表

臣某言伏奉制命復臣觀文殿大學士尋疊具辭免特蒙聖慈再降詔書不允不得再有陳請臣已望闕謝恩祇受訖者紫蓋分麾甘後循良之吏青規進直猥先侍從之官既假寵於藩維亦增華於儒綬臣其中謝伏念臣始塵科級即蓬英躔舟每至於蓬瀛光仍依於日月

晚逢新政深眷舊僚寬策免之常刑畀詔除之異數雖
自弛僅二年之久而簡知蒙兩命之加假征鎮之中權
還殿庭之右職進之犬雞之效顏方劇於汗顏司存雨
露之邊地彌高於清切紛盛世賢猷之衆獨微臣榮遇
之多遜避弗俞兢慚罔措茲蓋伏遇皇帝陛下天臨萬
寓子視羣工我澤如春思湛思之汪濊爾身在外憐復
玷之難難命靡憚於重申賞無嫌於寧僭臣敢不欽承
鴻渥益厲素心三省昨非當力圖於今是再叨大受滋

有愧於小知誓殫宣布之勞仰報初終之賜臣無任

賜銀合夏藥勅書

勅某卿望重舊鈞任隆巨屏茲屆炎歊之盛方宣勞
勩之多其賜珍良以昭眷顧今賜卿銀合夏藥至可
領也故茲示諭想宜知悉夏熱卿比好否遣書指不
多及

謝表

臣某言準都進奏院遞到勅書一道賜臣銀合夏藥臣

已望闕遙謝祇受訖者日長星火軫侯國之炎曦言出
絲綸須方丞之珍劑仁深扇暘恩釋負茲臣某中謝伏
念臣自遠雲龍之庭常憂狗馬之疾比承詔獎來布藩
條風雨晦明第謹天時之順參苓桂朮實慙藥籠之須
窺綠宇以欣榮啓寶奩而兢懼茲蓋伏遇皇帝陛下哲
臻燠若怨息暑咨方申命義叔之時眷南巡衡山之境
靡忘加惠庸賁守封臣敢不推廣上心勤求民隱與魏
君之五色允有光輝稽周典之十全庶無疾兆臣無任

降郡公謝表

臣某言伏奉制命以臣舉常良孫改官犯入已贓降榮陽郡開國公臣已望闕謝恩祇受訖者舉廉而濁如泥分甘嚴譴擇士而削以地恩畀寬科目坦制以兢慙手植圭而戰栗臣其中謝伏念臣幸緣復職例許荐員知公朝改秩之嚴乃忘體國知聖主去貪之切乃昧表民况當尸南曹典選之官且久預東府掄材之數衆方責備理合求全用門閥以取人孰云盜壁近闕庭而試吏

何至攫金厥既伏辜自應連坐雖國除而郡降居二品之中然爵賜其鄉猶在諸侯之上戴包荒之大德懷撻市之深羞茲蓋伏遇皇帝陛下提挈四維抑揚百辟賞受上者每丕勸於進賢刑無小焉宜必懲於故犯聊從薄責將使厚顏臣敢不循省詈尤圖惟報效職由獄吏已示貶於延年命錫卻卿尚晞功於白季臣無任

重明節進功德疏右語

右伏以誕彌厥月昭電繞以虹流於萬斯年頌天長而

地久載緡玉笈之字有衍赤精之符皇帝陛下伏願順
慶垂基惟皇作極永錫難老為上古之大椿申命用休增
泰元之神筮臣無任

會慶節進功德疏右語

右伏以宜君皇皇高脫屣於萬乘為衆父父垂綠鑑於
千秋大集殊因丕延多歷至尊壽皇聖帝陛下伏願文
齡有永舜壽無疆驗太史之書老人常見於南極誦宣
尼之語衆星長拱於北辰臣無任

會慶節進銀奏狀

伏以萬年億載之歡載臨誕節四海九州之養咸備慈
庭叨預守封敢稽報上前件物坤珍所效邦賦攸資瑞
溢商山知利源之不竭貢輸衡嶽符壽祉之彌堅所有
銀一千兩謹隨狀上進冒瀆宸嚴臣無任

冬至節賀表

臣某言伏以雷居地復日在巽維應周統以得天歲魏
儀而亞歲臣其中賀恭惟皇帝陛下剛明顯著仁愛敷

施七日閉關心法乾坤之施八荒開域壽同夷夏之躋
茂履昌期駢臻純嘏臣身縻方郡迹遠嚴宸徒瞻迎送
之雲共樂舒長之景臣無任

丐祠劄子

臣輒瀝愚誠仰干睿聽伏念臣猥以凡才荷陛下簡知
特異固非一日乃者輔政無狀引分丐閒衆言交擊罪
在不測獨賴天地覆載委曲保全寘諸安閒之地閱時
未幾記錄有加美職名藩舉以授之臣感激恩遇所以

圖報謂當如何捐軀委命且非所愛承流宣化固宜自勉而臣性資懦弱不習吏事規模淺陋短於御衆加以素有悖眩之疾發作無時年垂七十精力衰耗曠戾日增深惟長沙地控湖廣統縣十二自昔戶口為諸路之冠中興以來生聚涵養已及承平四十餘萬之衆使臣不病不老尚非守帥之才矧衰疾如上所陳者乎然臣前日不敢固辭冒昧一來者正以陛下親加擢用恩意隆厚臣子之誼所當欽承也適有天意憑藉聖化竊祿

彌歲偶未底於司敗今年至病侵技窮力竭宜去不去
私心固難自安其在公論將不容恕伏望聖慈俯矜危
惻賜以祠祿特護其所短免干大戾重貽晚節之羞亦
冀捨劇就閒專事醫藥或少延於暮齒矢心報塞沒世
乃已臣無任虔祈瀝懇之至取進止

奉御筆批
降詔不允

不允詔

倪思撰

勅某云云具悉長沙地控湖廣戶口為諸路冠信如
卿之言帥守之任必藉重臣卿開藩彌年教明南國

朕寔嘉賴之引疾丐祠良所未喻且卿每上章奏詞翰精確年少者所弗及足以驗神觀之不衰矣其體眷懷勉留填撫所請宜不允

賜銀合臘藥勅書

勅某卿為時元老作鎮重湖履冬序之嚴寒錫珍奩之良劑其承眷顧益衛冲和今賜卿銀合臘藥至可領也故茲示諭想宜知悉冬寒卿比好否遣書指不多及

謝表

良藥分珍申錫堯言之煖衰年被寵頓忘楚塞之寒恩
厚莫量感深曷報臣某中謝伏念臣一叨屏翰再值嘉
平乏宣布之小勤積曠瘵之大懼屬嘗移病未許投閒
封泥壘於玉堂以時而授乞刀圭於金鼎何恙弗除豈
曰曩章曾為異數茲蓋伏遇皇帝陛下博施仁政優待
藩方頒綸綍之光華融雪霜之凜冽慈憐若此稱塞謂
何時無札瘥幸同仁壽之域職在綏撫願奏和安之書

臣無任

謝賜紹熙四年曆日表

歲運無窮，裁成密度。王春有倂，誕告庶邦。吏拜賜以承
流，民知時而趨事。臣某中謝，恭惟皇帝陛下道參覆載，
職備羲和，天畏棗忱，式九圍而順帝星闕。隆德齊七政，
以授人，凡叨守土之官，咸起兢辰之志。臣敢不宣頌，詔
璽勸勉，農儔在歷，數於舜躬，孰能推步暨朔，南之禹教。
尚覲混同，臣無任

文忠集卷一百三十一